

գիրը: Նրա խօսքերը թեև անկապ էին, որպես քրմուհու առեղծոածներ, բայց գուրկ չէին իմաստից. ես կարող եմ կազմակերպել այսպես.

«Քո կեանքի ճանապարհը փուշերով է ծածկոած. ամեն մի քայլում դրած են քո առջեւ որոգայթներ. դու կընկնես նրանց մէջ, դարձեալ դուրս կը գաս, միշտ քաջութեամբ յաղթելով բոլոր դժարութիւններին: Այդ կռիւը քո կեանքի մէջ կտեւէ երկար, մինչեւ քո գլխի սեւ մազերը ճերմակ գոյն կը ստանան, այն ժամանակ կզարկէ թեզ համար խաղաղութեան ժամը, եւ քո բախտի արեւը, որ այժմ ծածկոած է սեւ ամպերով, կրկին կծագէ իր բոլոր պայծառութեամբէ:

Նա կանգ առեց եւ թոպեական լռութիւնից յետոյ շարունակեց, «դու սիրում ես երկուսին, երկուսն էլ գեղեցիկ են, որպէս դրախտի անմահ աղջիկներ. նրանք խիստ տաք սրտով կապոած են թեզ հետ, բայց նրանցից եւ ոչ մէկը»...

— Բաւական է, — կտրեցի ես նրա խօսքը. — գիտեմ ինչ պետք է ասես...

Նա տխուր կերպով նայեց իմ երեսին եւ թողեց ձեռքս, երեւի վիրաւորոեց, որ ես արհամարհեցի նրա արհեստը, ասելով.

— Հիւբբի, դու խօս ամենի համար այսպէս ես գուշակում:

Նա բաւականին հպարտ անձնասիրութեամբ պատասխանեց.

— Հիւբբին սուտ չի ասի. Հիւբբին խօսում է այն, ինչ որ յայտնում է նրան «գերագոյն ոգին»:

Մեր խօսակցութիւնը բոլոր ժամանակ, թէ Սուսանի եւ թէ մանուկ գուշակողի հետ պարսկերէն էր: Բայց նրանց կանոնաւոր արտասանութիւնից երեւում էր, որ նրանք չէին պատկանում բոշաների այն ցեղերին, որոնց շատ անգամ հանդիպել էի ես Պարսկաստանում: Նրանց երեսների թէ գծագրութեան նրբութիւնը, թէ կաշու գոյնը, որ աւելի սեւ չէր, թէ բնաւորութեան մեղմութիւնը, որ գուրկ չէր նոյն ցեղին յատուկ կրթոտ աշխուժութիւնից, — բոլորը ցոյց էին տալիս նրանց բոշաների մի աւելի ազնիւ եւ առանձին ցեղին պատկանելը: Բայց ինձ զարմացնում էր փոքրիկ աղջիկը: Սուսանը նրա մայրը լինելու համար բաւականին հասակաւոր էր. ուրեմն ո՞վ պետք է լինէր նա: Ես հարցրի պառնակից. մինչեւ նա իր բերանը բացելը, Հիւբբին պատասխանեց զարմանալի արագախօսութեամբ.

— Հիւբբին Սուսանի թոռն է, Հիւբբին անբախտ աղջիկ է, նրա մայրը կորած է, Հիւբբին պտոռն է իր մօրը, եւ նրա հայրը...

Պառաւը չթողեց նրան վերջացնել իր խօսքը եւ ինձ անծանօթ մի լեզունով սաստիկ բարկացաւ նրա վրայ. խեղճ աղջիկը իսկոյն սուս կացաւ: Ես